




O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

IULAI 2015

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

E le Ta'ua Faatasi le Suafa o le Atua i le Tusi o Eseta - Peitai....!

E laitiiti lava tusi o le Tusi Paia e sili ona faitioina e tagata e pei o le tusi o Eseta.

E toatele nisi ua tusitusi lima

pea i ai, ma fai mai, mai lava i lona amataga se'ia oo i lona faaiuga, e le ta'ua faatasi lava i le tusi atoa a Eseta le suafa o le

Atua. E le gata i lea, fai mai e vivii e Eseta le malosi faafitafita o tagata Iutaia, ma lo *faaauau itulau e 2*

O le Malo Faaloogia i le Taumafataga

“E te laulau mai mea i le la'o'ai ma a'u i luma o e ita mai ia te au.” (*silasila itulau e 3*)

E ui ina pi'o le Fofoga...!

*Silasila Itulau mo Tupulaga
Talavou p10*

O le Mafuaaga o le Pese:

**Precious Lord,
Take My Hand**

silasila itulau e 12

Valaaulia mai e Wallis ma Futuna 'Au Lakapi Taitoafitu a Leulumoega Fou

silasila itulau e 13



Tama ma teine o le Kolisi o Maluafou ma lo latou pule, le tamaitai o Lasi Tavae, ma ipu e lua na manumalo ai le a'oga i tauvaga o le “Violence Free”.
Ma ona pau lea o le a'oga e lua ni ana ipu na manumalo ai.

Faamagaloina Faamaloloina Faafouina

Saunia e Manu'alesagalala Enokati Posala TT

Tusi Faitau: Luka 18:9-14

Matua: Luka 18:14: “....aua o se faamaualuga ia te ia, e faamaulaloina lea, a o le faamaulalo ia te ia, e faamaualugaina lea. *itulau e 9*”

latou fiafia e fasioti o latou fili. Ua fai mai soo foi faapea o Eseta na te le iloa se faamagaloga faa-Kerisiano, ae fiafia e faataunuu sauaga o le tau atu ma sui i fili o Isaraelu.

E oo lava foi i tagata Iutaia latou, latou te fesiligia le tatau ona iai pe leai o le tusi a Eseta faatasi ma isi tusi o le Tusi Paia. O nisi o a'oa'o iloga o le lotu Iutaia, ua latou faavaelutai le taua o le tusi. Fai mai i latou, e moni lava na tusia e le Agaga Paia, ae na fai o se tusi na ona faitau iai, ae le o ni tusitusiga pa'ia e tatau ona tuu faatasi ma isi tusi o le Tusi Paia. O le mea moni, faato'a faamaonia lava le aofia ai o le tusi a Eseta i le Tusi Paia i le fononua i Iamania (Jamnia) i le tausaga Mesia e 90AD.

I le lotu Kerisiano lava ia, sa tau matemate lava le toatele i leni tusi pe tatau ona iai pe leai. O le tagata o Melito o Sardis, i le faaiuga o le senituri lona lua, na te le'i talia le tusi leni o se vaega o le Tusi Paia. O se isi lisi na faia o tusi o le Tusi Paia i le tausaga e 367, e le'i faitaulia ai foi le tusi leni o Eseta.

O Matini Luteru foi, i ana saunoaga malolosi e masani ona fai, na lavea ai foi ma le tusi a Eseta. Fai mai o ia e uiga i nisi tusi e aofia ai ma le tusi o Eseta, "Ou te matua le fiafia iai, ma'imau pe ana le o iai nei tusi, ona e malosi tele le lanu faa-Iutaia, ma e tele uiga faapaupau o loo iai.....O loo faaalua ai le taua o Isaraelu i fuafuaga a le Atua, peitai o ona pulega faafitafita, ma le faamaligi toto le faatua'oa e matua faitiaina lava."

O nisi na o manatu sa iai ma o loo iai e uiga i le tusi o Eseta. Ae fai mai le faifeau lauiloa o William Barclay i lana tusi, "*In The Hands of God*", sa iai i ni suesuega sa fai i le tusi o Eseta, na ta'ua ai nisi o faitioga faasaga i leni lava tusi. Na saunoa ai se tasi o faifeau faia'oga aupito sili ona logologoa o le Feagaiga Fou e faapea. O aso

o le Taua Tele I a le Lalolai - 1914-1918, na si'omia ai e le fili se vaega o le vaegaau a Peretania mo se taimi umi. Ua oo ina lelava fitafita i nonofo nonofo e leai se mea e fai. Sa iai se fitafita a'oa'oa lelei ma le atamai, ae le talitonu i le Atua. Ma o le mea sa sili ona misi ia te ia i lea taimi umi, o se tusi e faitau. Ona soona alu ai lea i le faifeau o le fitafita atonu e maua mai ai se tusi. Ae tasi lava le tusi sa iai i le faifeau, o le Tusi Paia. E tuu atu i le fitafita ae fai ane e matua le aoga lava le Tusi Paia mo ia. Peitai ona o le leai o se isi mea e faitau, na ala ai ona alu ma le Tusi Paia. Na su'e le Tusi Paia ma matala tonu lava i le tusi o Eseta. Ia, poo a lava faitioga i le tusi o Eseta, a o tala o iai, e fetauti lelei lava mo ni ata tifaga e fiafia iai tagata. Na faitau lelei lava e leni tagata le tusi atoa a Eseta se'ia uma. Fai mai a ia, a faapea uma le Tusi Paia e sili ona faitau iai. Ona faitau ai lea o le Tusi Paia, ma oo ina liliu ai e aveva ma Kerisiano. Ma e talitonu lava o lona faitauina o le tusi o Eseta na ta'ita'iina o ia i lona faaolaina.

Na faamatala foi William Barclay e uiga i le foma'i na faaolaina ona o lona faitauina o le tusi o Levitiko, ona o lona ofo i faamatalaga lelei o tulafono o loo iai e uiga i le soifua maloloina lelei.

O le manatu la, a iai lava ni tusi e tatau ona aveese mai le Tusi Paia, o le Eseta ma le Levitiko. Ae pei ona faamatala e William Barclay, o ia tusi e lua na aveva ma ala o le faaolataga i tagata e toalua lea na ta'ua - o le fitafita ma le foma'i. O le mea lea e le tatau ai lava ona toe lotea le Tusi Paia, ma tusi o loo ua aofia ai.

E moni lava, e leai se isi e mafai ona fai mai o le tusi o Eseta e tutusa ni mataupu faale-lotu e maua ai e pei ona maua i le Evagelia a Ioane. Pe fai mai foi e maua i le tusi o Levitiko le tala lelei o le alofa tunoa e pei ona maua i le tusi o Luka. Peitai i le soifuaga faakerisiano ua talitonu ai, e iai lava le aoga o tusi uma ua iai nei i le Tusi Paia. Tatou te le iloa lava pe o fea o tusi ua iai nei i le Tusi Paia, o le a ala mai ai le faaolataga a le Atua, i le loto o se tagata o loo ia manaomia.

O le Malo Faaaloologia i le Taumafataga

I le fuaiupu leni o le Salamo 23, ua sii mai le faamamafa a le fai pese salamo, ua le o le mamoe i le vao mu'a, a o le malo aloa'ia i se taumafataga mamafa ma le taua. O taumafataga, o se mataupu lava e ta'ua soo i le Tusi Paia. E pei o Mataio lea na ia laulauina se taumafataga mo Iesu ma ona soo, a o tutu mai fafo ona fili, le au falesaio. Lea na fai ane ai falesaio, "Se a le mea e 'ai ai o ia ma inu faatasi ma tagata ao lafoga ma e agasala."

Mulimuli ane i se isi vaega o Evagelia, na valaauina ai Iesu e falesaio i se taumafataga - (Luka 7:36: "Ua fai mai le tasi o le au

falesaio se'i la aai ma ia; ua maluu atu ia i le fale o le falesaio, ona taoto ai lea o ia e taumafa." A ua galo i le falesaio ona u'u le ao o le Alii i le suau'u, a ua faia e le fafine amio leaga ma le agasala, ina ua ia uuina 'a'ao o le Alii. (Luka 7: 37-38: "Faauta foi, o le fafine o le aai, o ia o le fafine agasala, ua iloa e ia ua taoto o ia e taumafa i le fale o le falesaio, ona aumai lea e ia o le fagu alapasa ua tumu i le suauu manogi, ua tu foi o ia i tua i ona vae, ua tagi, ua faasisina ifo e ia loimata i ona vae, ua soloi ai i lona lava lauulu, ua sogi foi i ona vae, ma faauuina i le suauu manogi.")

O se tasi foi tausama'aga o loo

O LE LAUGA

Matua: Mataio 9:13b: “Aua ou te le’i sau e valaau i e ua amiotonu, a o e agasala ina ia latou salamo.”

Manatu Autu: Valaauina i le Malo o le Atua

O le tala i le valaauina o Mataio e fai ma soo o Iesu, o loo afifi mai ai se ata manino o e filifilia ma valaauina i le Malo o le Atua.

O le ata faale Feagaiga Tuai o loo tau tutu ma taofiofi mamau foi iai isi Ekalesia, ua faapitoa poo ua uma foi ona faailogaina tagata e sao atu i le Malo o le Atua.

O nisi Ekalesia ua latou faauiga seseina le manatu o loo aumai i le tusi o Faaaliga e faapea, e na o le selau fasefulufa afe tagata o le a faasaoina mai le to’asa o le Atua ma ulufale atu i lona Malo. O nisi Ekalesia ua latou faailogaina le lalolagi e taunuu iai isi lotu eseese, o isi ua latou faamamafaina ituaiga o tagata e maua le malo lea. Faapea nisi ua na o le ituaiga tau tupu, poo le vaega taualoa, ia poo le vaega foi o faifeau, a o

Saunia e Rev.. Lui Ama ‘Ale

(e sui a’i le lauga na tofia e le’i taunuu mai)

le tagata agasala e matua leai, leai, leai lava sona avanoa.

Mai nei talitonuga ma taofi, tatou te iloa ai, ua latou faaleagaina le mataupu silisili o le faatuatua. E maua le ola e faavavau pe a SALAMO MA FAATUATUA ia Iesu Keriso. Afai e moni ia taofi, o lona uiga ua leai se aoga o le lotu salamo, leai foi se uiga o le faatuatua, aua o le salamo o le faitotoa lea o le toe fuata’ina ma le faafouina o le ola tuai. O le salamo na te fusia uiga leaga uma o le tagata ma lafoa’i, o le a fulitua i tu’inanau ma lona tagata tuai, ae fanau mai o se tagata fou.

O le mea moni e le faapito i se vaega o tagata, e sao i le Malo o le Atua. O Iesu Keriso na afio mai e faatu le Malo o le Atua, a o ia lava o le Malo o le Atua, ua ofoina mai o ia mo tagata uma ua faaavanoa le faitotoa mo soo se tasi, mativa, mau’oa, malosi, vaivai, e oo lava i tagata agasala, pe afai e lafoa’i mea o le lalolagi

o loo atua iai.

O lea tonu lava le tulaga tatou te vaaia i le valaauina o Mataio e fai ma soo o Iesu. O Mataio o se tagata faigaluega ao lafoga a le malo o Roma. Ua faapitoa o ia i lenei itu o Kalilaia ma sa faamautu o ia i Kapanaumi. E tolu ituaiga lafoga sa aoina i lea vai taimi.

LAFOGA O FANUA (seleselega) O lafoga nei e aoina i le taimi e selesele ai fua o faatoaga, ona vavae lea o le tasi-vae-sefulu poo le sefulua’i ma foa’i mo le malo.

LAFOGA O TUPE MAUA

O tagata faigaluega uma e vavae le sefulua’i o lona totogi mo le malo.

LAFOGA A TAGATA E LE O NI TAGATANUU O ROMA

O tagata matutua ua sili i le sefulufa tausaga seia oo i le matua e 65 tausaga, latou te ofoina atu soo se mea latou te maua mo le malo.

O le matafaioi la lenei sa feagai ma Mataio, o le lafoga mulimuli la e pei ona ta’ua, sa tafili saunoa iai le ‘au telona e pule latou i le sasauina aua o mea na sa latou pule iai, e fai mo lo latou komisi.

O le lafoga foi lenei sa ‘ina’ina iai tagata Iutaia latou te le fia totogia, lea foi o le a tautala iai Iesu: “Ou te lotu i le alofa, ae le o le taulaga.” E le manatu le Alii ia latou taulaga, aua o loo fai ma le oi, fai ma le muimui ae sili pe ana ‘aua le faia, a ia latou alolofa i tagata o

O le Malo Faaaloologia i le Taumafataga

ta’ua i le Pese a Solomona 2:4 o loo faamatala mai ai e le fafine e faapea: “Na ia aumaia a’u i le fale uaina; o lana fu’a i o’u luga o le alofa lea.”

I le Salamo e 23, ua valaauina i tatou o tagata leaga i lana tausamaaga ina ia ia faaali ai lona alofa mo tatou. Ae tatou te le’i faauuina lona ao i le suauu, a ua ia

faauuina tatou. “Ua e faauuina lo’u ulu i le suauu, ua taumasuasua la’u ipu.”

Ua valaauina tatou e le Alii i lana tausamaaga, ma avea ai tatou o ana malo aloa’ia: “E te laulau mai mea i le la’o’ai ma a’u i luma o e ita mai ia te a’u; ua e faauuina lo’u ulu i le suauu ua taumasuasua la’u ipu.” Salamo 23:5)

O LE LAUGA

faaauau mai le itulau e 3)
agasala, tagata matitiva, ma tagata vaivai.

Afai ua latou iloa e sese po o se agasala fo'i le mea o faia nei e Mataio, e ao ina fesoasoani iai, alolofa iai, ma fai iai se galuega ina ia aveesea mai le li'o o tagata leaga ma tagata agasala lea la ua afio mai Iesu e ta'utino lea alofa, ua valaau ia Mataio "Ina mulimuli mai ia ia te au."

Ioe le au faitau e, e ese lava le pa'i atu o lenei feau i le telona, e pei o se vai malu ua faamaluina lona tino galala, ma ua oo ina avaga i ai lona loto, e le'i toe faatali, pe pei o le mea o loo mafi ai le aufaigaluega i nei aso, a valaauina e se aulotu, ona tali atu lea e faapea: Faatali se'i ou mafaufau, pe se'i o ma talatalanoa ma le tina o le aiga. Pe fai foi se fua faatatau e fua iai le tali atu i lea nuu ma lea Ekalesia, a laitiiti pe mamao foi i tua poo Savaii, ona sisi'o lea; malilie ma te malaga i fafo e fia faalautele lo ma atamai, ae e vaai atu e taulalata i le taulaga, pe o se aulotu tele foi, ona vave lea o le ioe.

Vaai foi ia Mataio, e le'i tau faia sa na fua faatatau. E le'i tali atu foi, faatali, pe faapea, malilie se'i oo i le tausaga fou. Pe faapea se'i uma ona faapaleni ana tusi risiti, leai. Na faalogo loa i le i'uleo malu tu loa i luga ma savali, ua leai lava manatu i le tamaoiga sa maua fua ma le filemu. Ua lafoa'i mea uma, aua ua valaau le Alii ia te ia.

O ai se tagata ua matala mai iai le faitotoa o le manuia ae teena? Tasi lava le mea e le'i

galo ia Mataio, o lana peni. O le peni matamata tetele lenei na tusi ai le talafaasolopito o lo tatou Alii Faaola. O le faailoga lena o le tagata ua lagona moni lona valaauina, ua faaaogaina e fai ma mea faigaluega o le Malo o le Atua. Ua avea ma tusiata o le faitotoa o le Malo o le Atua. O le a le faitotoa? O Iesu Keriso, o ia o le faitotoa. Pei ona ia fetalai: "O a'u nei le ala, ma le upu moni, ma le ola."

A o fea la o iai le manatu faa-Iutaia, e le talia tagata agasala i le Malo o le Atua? O lea ua faamanino e Iesu e pei ona fai mai la tatou matua, "Aua ou te le'i sau ou te valaau i e amiotonu, a o e agasala ina ia salamo." O le foma'i mo e mama'i, ae le mo le 'au malolosi. O Mataio, ua na ona

malosi o le tino, a ua amata 'ati'atia le tino ma ivi, ua ma'i faaleagaga, lea ua afea e le foma'i ma ua maua ai lona mapusaga.

Amuia lenei tagata agasala, ua matua fulitua lava i lona tagata tuai, ae faapefea i tatou? O le mea moni, e toatele ua le lagona pea le valaau a le Alii. Le au uso e, o le faitotoa ua avanoa, ma o loo valaau mai pea Iesu mo i tatou ina ia tatou ulufale e talisua ma ia i lona Malo e faavavau.

Fai mai la tatou matua: "Aua ou te le'i sau e valaau i e amiotonu, a o e agasala ina ia latou salamo."

(O le lauga lenei na uluai lomua i le Sulu o Aokuso 1985)

Ia Vivii Atu Mea Uma i le Alii

Salamo 150: 3-6:

Ia outou vivii atu ia te ia i le leo o le pu
vivii atu ia te ia i le napeli atoa ma le kitara,
Ia outou vivii atu ia te ia i le topa ma le siva;
Vivii atu ia te ia i le menima ma le faaili.
Ia outou vivii atu ia te ia i sumepalo taalili;
Vivii atu ia te ia i sumepalo leo tetele.
Ia vivii atu i le Alii o mea uma lava e manava.

O le Vaitafe o le Naila

O le Naila e lua vaitafe e maua mai ai - o le Blue Nile ma le White Nile. E tuu faatasi ia vaitafe ona maua ai lea o le Naila, le vaitafe aupito umi i le lalolagi. E amata mai le White Nile i Lake Victoria i Uganda, a o le Blue Nile e amata mai i Lake Tana i Ethiopia. E fetau nei vaitafe e lata i Khartoum le laumua o Sudan ona tafe ai lea i le Sami Metiterani i le mamao e 4184 maila. O le eleele lelei e aumaia e lenei vaitafe o se mea matua taua lea mai anamua i faato'aga a Aikupito. O lea palapala lelei e aumai mai se mea mamao, o le mafuaaga lea na tapuai ai tagata Aikupito i le atua o le Naila, o Hapi.

O le Filemu ma le Paganoa o le Vaotuufua

“E! ta fia maua apaau e pei o le lupe...”

O Ierome o se tasi o Kerisiano iloga o lona fa o senituri talu ona fanau mai le Faaola. O se tagata sa matua tele lava ana feau sa feagai ma ia. I le matau a tagata sa latou soifua faatasi mai, e pei lava o le tele o ona taimi o le a’oa’oina lea o tagata i le Tusi Paia, asiiasi, pe fai foi ni faalapotopotoga fesoasoani mo tagata puapuagatia. A o le mea lava sa sili ia te ia, o le fia maua lea o se avanoa e nofo toatasi ai ma su’esu’e le Tusi Paia.

O le taufaai’ui’uga o le senituri e 4, a o tautevateva le Ekalesia Kerisiano, ona faato’a mapu mai i le tele o sauaga sa

feagai ai i senituri e lua ua mavae. A o le taimi lea o Ierome, ua tele ina pulea e le Ekalesia Kerisiano atunuu o Europa, i mataupu faalelotu, ma faafaiga malo. E leai se mea e le oo iai le mafaufau o Ierome, ma na suesuea.

O nisi foi tausaga sa avea ai o ia o le lima taumatau o Pope Tamasi (Damasus), ma o le vai taimi lea na ia amataina ai le galuega na ta’uta’ua ai o ia: o le faaliliuina lea o le Tusi Paia i le Gagana Latina.

Peitai, ina ua maliu Pope Tamasi, na faanoanoa lava o ia ina ua le tofia o ia e fai ma ona sui. Ae le gata i lea, ua fai pupula mai lava nisi o faitioga

a nisi o ona fili ina ua maliu Tamasi. O fea se mea a sola o ia iai e lafi ai?

Na oo ina sola o ia ma nofo mau i Peteleema, ma e tolu sefulu tausaga o nofo ai o ia i Peteleema, ma fai ai ana tusitusiga. E foliga mai ua ia maua le lafitaga sa ia moomia. O Peteleema na faauma ai lana faaliliuga o le Tusi Paia, lea ua lauiloa i le igoa o le Vulgate. Na ia tusia foi nisi faamatalaga o tusi ma mataupu o le Tusi Paia.

E le o se mea la e ofo ai, pe a tatou silafia, o se tasi o mataupu o le Tusi Paia e aupito fiafia iai Ierome, o le Salamo e 55, aemaise lava fuaiupu e 6-7:

“Ona ou faapea lea, E! ta fia maua apa’au e pei o le lupe, ou te lele ese ai lava, i le ou nofo mau ai. Faauta, ou te sola mamao atu lava; i le ou nofo ai i le vao.”

Salamo 55:1-8: “Le Atua e, ia e faafofoga mai i la’u tatalo, aua foi e te liliu ese i la’u aioi atu. Ia e faafofoga mai ia te au, ma tali mai ia te au; ua ou faanoanoa i lo’u mafaufau, ma ou uiu; ona o le leo o le ua ita mai, ona o le sau o le amio leaga; aua ua latou faaoo mai ia te au le amio leaga, o le ita lava ua latou faasaua mai ai ia te au. Ua sapotuvale lo’u lava loto i totonu ia te au; ua oo mai foi ia te au le mata’u i le oti. Ua oo mai lava ia te au le matau ma le gatete; ua matua faagateteina au.

Ona ou faapea lea, E! ta fia maua apaau e pei o le lupe, ou te lele ese ai lava, i le ou nofo mau ai. Faauta, ou te sola mamao atu lava; i le ou nofo ai i le vao. (Salamo 55:1-7)

“Amata Nei Loa Ona e Tatalo”

O le malaga a le vaalele e aga’i i Niu Ioka i Amerika. Ua ou malaga soo ai e leai lava ni mea e tutupu ai na o le fiu i nofo ona o le umi.

Peitai e le’i umi ona alu le malaga lea ou te alu ai, ae iloa e le ave vaalele e iai se mea o faaletonu i uili poo pa’u o le vaalele, ua mau ma ua le mafai ona tatala mo le tu laueleele. Ona taumafai ai lava lea o le avevaalele e loka uili ma toe tatala, loka ma toe tatala. A ua le matala lava.

Na fesili ifo i ofisa i le malae

vaalele mo se fesoasoani ma ni faatonuga. A o taamilomilo le vaalele i luga o le mea o iai le malae vaalele, a ua amata ona fui i vailaau faapitoa le malae ina ia aua nei mu le vaa pe a tu laueleele. Ua tumu foi taavale fuimu e sauniuni mo se faalavelave pe a tu laueleele le vaalele ae le matala ona uili.

Ua tautala mai foi le pailate i lona leo to’a ma le le popole, ma faatonu le pasese i le mea e tatau ona fai, ia punou i lalo ma tuu lou

ulu i le va o ou tuli ma ‘u’u e ou lima ou tuli.

Ua fetagisi isi o le pasese; o isi ua maligi lemu ifo o latou loimata. Na o ni nai minute tu laueleele le vaa, ae tautala mai le alii ave vaalele: “Ua amata ona tatou faaiifoifo i le malae vaalele. I le taimi lenei, e tusa ai ma tulafono faava-o-malo o femalaga’iga i vaalele, o lo’u tiute ou te faasilasila atu ai e faapea: “Afai e te talitonu i le Atua, amata nei loa ona e tatalo!”

tusia e Charles Swindoll

IOANE KALAVINI

O LE APOSETOLO A'OA'O ATU

O Kalavini o le tagata e fiafia i polokiki, poo faiga malo. Na matua fiafia lava o ia i manatu o se filosofia anamua o Seneca. Na faaaogaina e Kalavini talitonuga o lenei tagata, ma ia tusia ai se tusi e tumu i finauga faale-maufaufau, e taumafai ai e sue se mafuaaga o le ituaiga pule na faaaogaina e Nero na te pulea ai le malo o Roma. I lenei tusi na faaalua ai e Kalavini, e iai le pule mai luga o loo i tupu, peitai na ia faitioina mamafa le faamaualuga, agasala, ma a latou faaiuga na ala ai ona latou faia ni uiga faatiapolo.

Na lomua lava e Kalavini le tusi, ae le'i alumia. Ae lua ni mea lelei na tula'i mai ai i lea tusi na maumau ai tupe ma le taimi. Muamua, e isi ni nai mea aoga na iai i le tusi na avea ma faavae mautu i ona talitonuga faa-polokiki i taimi na ia ta'ita'iina ai le Toe Fuata'iga.

O lona lua, ina ia mafai ona ia tusia le tusi, na nofo mau ai o ia i le aiga o se tagata e matua talitonu i le faa-Luteru lea ua sasao i Europa. Ma, na iu ai ina matua aafia o ia i talitonuga ma uiga faa-Porotesano.

Aisea na ia filifili ai e nofo i le aiga o lenei tagata? E le taumate na manatu Kalavini o le a le mafai ai e i latou latou te tupulaga, ma tutusa foi o latou tulaga i le lotu, ona faalavelave i ana tusitusiga. I se isi foi itu, e le taumate o le taitaiga a le Agaga Paia na mafua ai.

A o punoua'i Kalavini i ana tusitusiga i mataupu faale-lalolagi, ae o le la e nofo le alii e ona le aiga i le isi potu, ma na faitau ma teu i lona loto ia tusi ma tusitusiga a Matini Luteru, ma ia faamatala le faamalalamaina ai o ia.

Tasi lava le mea e faalavelave

soo i tusitusiga a Kalavini, o le tu'itu'i soo i le faitotoa o le tagata e ona le fale, e tagata Porotesano, tagata Farani, tagata mai isi atunuu, e fia sulufa'i atu iai. E le taumate sa fiafia lava Kalavini e faalogologo i faamatalaga a nei tagata sulufa'i, ma lo latou faamatalaina o o latou talitonuga, atoa ma a latou taupulepulega e ono lamatia ai lo latou ola. Ae iai foi aso e na o Kalavini ai le fale, a o alu le tagata lea e asiasi i tagata matitiva ma mama'i, ma tufatufa iai meaai, o tama'i tusi i talitonuga faa-Luteru, ma tama'i tusi o mataupu mai le Tusi Paia. Ae peitai, na oo ina susunu olaina lenei tagata ona o ona talitonuga faa-Porotesano ma lona auai i le atina'eina o le Toe Fuata'iga. O lea mea, ma le tele o isi mea na iloa e Kalavini a o nofo ai o ia i le aiga lea, na totona mausali i le mafaufau o Kalavini, ma le mafai ona toe aveesea.

O le Liliuga i Totonu

O nisi vaega o le soifua o Kalavini e faale tele ni tala iai, ona na te le'i ta'ua i ana tusitusiga. A o se taimi i le va o le 1529 ma le 1533, na liliu ai Kalavini mai talitonuga faa-Katoliko, i talitonuga faa-Porotesano ma le faaolataga e ala i le faatuatua. Peitai sa tumau pea o ia o le tagata Katoliko. E leai se isi na te mautinoa lelei le aso na liliu ai o ia. O nisi faamaumauga o loo maua ai na amata lauga o ia i le tausaga e 1529, mai pulelala e fai i maa, i nuu, ma "totonu o fale e tausai ai manu e lata i vaitafe." E le o malamalama lelei foi pe o a mea sa lauga ai Kalavini, ae fai mai se isi na faalogo iai, "na ia ta'ua ni mea e fou i le faalogo." O ona lagona lagolago i talitonuga faa-

Porotesano, na amata mai i aso na nofo ai le fale o le tamaloa lea na susunu olaina e le lotu.

Na faamatala e Kalavini se tasi o mea na tupu, i se tasi o ni ana pepa na lolomi: *O ni Faamatalaga o Salamo* (1557) na ia fai mai ai:

Na tosoaina mai a'u e le Atua mai le tulaga le amana'ia ma amataga faatauavaa ma faae'ia te a'u le tofiga taua o le alagaina ma tausai le Tala Lelei. O le mea na ulua'i tupu o le avea o lo'u liliu e le'i fuafuaina, ma mea na ia faato'a filemuina ai se mafaufau finauvale, aua sa ou matua mulimuli i faiga ma talitonuga faataulaitu o le Pulega faa-Pope e le mafai lava e se isi mea ona sii mai a'u mai le ta'ele o ia talitonuga. Ma o le tofo i le suamalie o uiga faale-Atua, na musaesae ai lo'u filiga ina ia faaauauina, ma avea ma mea e tumau ai pea lo'u sailiili i a'u suesuega sa fai. E na o le tasi le tausaga ae amata ona o mai ia te a'u tagata na manana'o i a'oa'oga mama ma le le 'alu'alua o mataupu silisili.

Pei lava foi o Matini Luteru, e le'i ta'ua foi e Kalavini pe o anafea tonu na liliu ai. Aua o nei tagata Toe Fuatga'i e le'i manatu mamafa i itu tau i lo latou lava olaga, ae sa latou tulituliaupuina le faatuputupula'ia o le Toe Fuata'iga.

O ulua'i tagata Toe Fuata'i e le ni tagata manatu faapito, a o i latou lava o ni tagata na tuuina atu atoatoa lo latou ola mo mea sa latou talitonu iai. Na malamalama lelei i latou i sauaga, ma e latou te le'i 'alo 'ese mai ai. O le 'au Toe Fuata'i o ni tagata e aunoa ma le fefe. Sa latou faaupu o latou talitonuga e aunoa ma le fefe. Sa ola i luga o mea sa latou talitonu iai, ma sa latou iloa lelei le tuaoi o le mea tonu ma le mea sese.

E manatu nisi o le liliu o Kalavini na tupu i le tausaga e 1533 ona o mea na mulimuli mai ia te ia i lea tausaga. E oo mai i le vai taimi

Ripoti o A'oga

O se ripoti lenei o a tatou a'oga na tuuina atu i le fonotaga a le Komiti o A'oga a le tatou Ekalesia, ma faataatia foi i luma o le Fono Tele.

O loo sologa lelei pea le gasologa o lenei vaitau i le molimau a le ofisa o le Faatonu i ana asiasiga masani. Ua mae'a su'ega muamua o lenei tausaga e pei ona faatinoina i le masina o Me, ma ua mae'a feiloa'iga a le tele o a'oga, ma matua na faatalalanoaina ai le taumafai a

le fanau. Faamalulu atu ona o le tuai ona faamaopoopo e le ofisa o i'uga o su'ega nei ua le mafai ai ona oo mai se ripoti auilili o nei su'ega mo le fono lenei a le komiti, ae o le a tuuina mai i le isi fono o le a sosoo mai. Ae o sona aotelega lava e atagia ai le manaomia pea ona una'ia le a'oa'oina o mataupu uma aemaise lava le matematika ma le gagana Peretania. Ua faaauau pea ona faamamafa le faitau tusi i a'oga uma ma ua o gatasi foi ma le taumafaiga a le

malo e pei ona faia ai le la faiga paaga ma le SSAB.

Na auai a tatou a'oga e lua - Kolisi i Maluafou ma le Kolisi i Nuuausala, i le tauvaga o le "Samoa Ne'i Galo" lea na faatinoina i le masina na te'a nei. O lenei tauvaga o se taumafaiga a le Ofisa o A'oga, Taaloga ma Aganuu mo le toe faaolaolaina o la tatou aganuu ma e filifili lava e latou a'oga e auai.

Sa molimauina le lelei tapena o taumafaiga a tatou a'oga ma tulaga mai ai le Kolisi o Maluafou i le tulaga muamua i le ma'ulu'ulu ma

faaauau itulau e 12

IOANE KALAVINI

O LE APOSETOLO A'OA'O ATU

lea, o le susunuina o tagata e le lotu ona o ni o latou talitonuga e ese mai i a'oa'oga a le lotu, sa taatele, ae le'i aafia ai Kalavini, pe fesiligia ai foi o ia, e le taumate ona sa au faatasi pea o ia ma le Ekalesia Katoliko. O lea 'au'au faatasi na avea ma lavea'i ia te ia ma ua le faitauina ai o ia o se Porotesano.

Peitai, o lea tulaga na suia faafuase'i ina ua mae'a se lauga na fai e Nikolasi Kopo (Nicolaus Cop).

O le Lauga na Vevesi ai

O le tausaga e 1533. Na fo'i atu Kalavini i Paris i le taimi o feteena'iga o manatu. O loo taumafai Europa e faato'ato'a le vevesi ona o le tula'i mai o le faatuatuaga Kerisiano e faavae i luga o tusitusiga a Matini Luteru. O le mafuaaga o le fo'i o Kalavini i Paris ona o lana uo mamae o Nikolasi Kopo ua tofia e fai ma polofesa i le Iunivesite o Paris. Na mana'o lava e iai i le aso e fai ai le lauga muamua a Nikolasi i tagata iloga ma tagata a'oga o le Iunivesite. Na nonofo faatasi Kalavini ma tagata iloga ma aloa'ia o le Iunivesite, aua o ia fo'i

o se tasi o tagata lauiloa ona o ana fo'i suesuega.

Na matua faatumuina le falefono o le Iunivesite i le aso muamua o Novema, i faifeau o le Ekalesia Katoliko, ma tagata popoto iloga i mataupu eseese o a'oa'oina i le Iunivesite. Ona savali atu lea o Nikolasi ua tu i le pulelaa.

O le lauga na faia ma le faamoemoe e toe silasila ai i sini mo faiga faavae ma pulega, ma o faiaoga ta'ito'atasi ma lauga aloa'ia ta'itasi na faatulaga ina ia faaali ai fuafuaga a le faiaoga ia mo galuega o le tausaga atoa.

Na amata le lauga a Nikolasi i le faalauiloa o lana mataupu: "O le Filosofia Faa-Kerisiano". E le taumate lava le faanatinati o le mafaufau o Kalavini ma na manatua le tele o po sa la talanoaina ai ma Nikolasi o la talitonuga i le faatuatuaga faa-Kerisiano. Na tau feti'i le manava a Kalavini ina ua ia 'i'ite e le taumate o le a faaaogaina e Nikolasi le avanoa e faaali ai ona manatu. Ma e le'i umi ona taumatemate o Kalavini. Na lauga Nikolasi e pei o le falefono e na o tagata Toe Fuata'i o loo iai. Na

amata le lauga a Nikolasi i lona faamatalaina o le filosofia faa-Kerisiano. O le tele o ona manatu e fau mai le gagana Eleni, o se gagana e talitonu le Ekalesia Katoliko e feteena'i ma talitonuga o le lotu. O nisi o mea na ia ta'ua e sii sa'o mai lava i tusitusiga a Matini Luteru ua mae'a ona lomina. Na ia faaali lona nofo aitalafu ia Matini Luteru i lona faapea: "O le tulafono e ola i faatonuga, faamata'uga, u'una'iga, ma e le folafolaina mai ai ni faamoemoega lelei. O le Tala Lelei e le galueaina i luga o le faamata'u, e le faamalosi i le faaaogaina o faatonuga, ae a'oa'o mai fuafuaga lelei a le Atua mo tatou."

O lea saunoaga malosi ua lava lava lea e lu'iina ai le Ekalesia, peitai e le'i gata ai i inei, a ua toe faaopoopo mai: "O le atalii faamaoni e tautua i lona tama a o soifua le tama, ma ia maua ai le tofi o faamanuiaga mai le tama pe a oti o ia. E ono foliga mai le tofi o se tau i le tautua faamaoni o le atalii, peitai e le o se mea e foliga mai o loo nofo aitalau ai le tama i le atalii. O le mea foi lea e tatou te faamaoni i le Atua, tautua ia te ia ma tausi ana tulafono ona o tatou o lana fanau. O faamanuiaga a le Atua e le o se tau i lea o lea auunaga. Peitai o ni penefiti o lo tatou faaolataga e maua mai lona alofa tunoa.

Ia e tuuina atu i le Alii mea e te popole vale ai, o ia lava na te tausia oe

Na ta'ua e se faifeau i le atunuu o Peretania i se tausaga ua leva atu, se mea na ia faalogo iai e le mafai ona toe galo ia te ia. Fai mai o ia, o se faifeau ua logologoa ona tala i tagata Kerisiano o Peretania, faapea foi ma isi atunuu Kerisiano, i le lelei o ana lauga, i nei tausaga e tele o lauga lava i lona falesa, ma tumutumu atu iai tagata i le fia faalogologo ai. Na ta'ua e le faifeau lea na faia le tala, ina ua mae'a le sauniga na lauga ai le faifeau ta'uta'ua, ona alu lea iai e feiloa'i iai i le faifeau o le aulotu. "Lau Susuga, e faapefea ona e **tau'aveina lenei galuega** i nei tausaga e tele e aunoa ma sou fiu, vaivai, pe faaletonu foi au lauga ma le o mai ai tagata e faalogologo?"

Ae tali mai le faifeau logologoa i le lauga lelei:

"I le galuega lenei, **e te le tau'aveina le galuega, ae tauaveina oe e le e ona le galuega.**"

Fai mai le na faia le tala, e le mafai ona galo ia te ia le moni o lea faaaliga na fai e le faifeau ta'uta'ua. Aua e moni lava, o le taimi lava e te tau'aveina ai le galuega na o oe, e le manuia ai, ma le fia faalogologo ai tagata i au lauga.

E anoanoa'i i le Tusi Paia ni mea e faamaonia ai le lagolago mai o le Atua i galuega o tatou faia mo ia. Fai mai le fai Salamo: "Ia e tuuina atu i le Alii o mea e te popole vale ai, o ia lava na te tausia oe." (Salamo 55:22) "Cast your burden on the Lord, and He will sustain you." Lafo au avega i le Alii, o ia lava na te fesoasoani mai ia te oe.

Fai mai Mose i ana upu faamanuia i le nuu o Isaraelu a o le'i oti, i le Teuteronome 33:27: "O le mea e te nofo ai o le Atua o le

faavavau lea; oi ou lalo foi 'a'ao o le faavavau...."

O lenei folafolaga e iai mea e tatau ona iai ona faato'a taunuu lea. O le mea muamua, e tatau ona tatou talia le mea ua tupu. Afai tatou te le malilie ma tatou faatautee iai, ona le taunuu lea o le folafolaga.

Na ta'ua e se alii lauiloa o Paul Sangster se asiasiga a lona tama i se teine ma'i i se falema'i, o le teine ua faasolosolo ina po lana vaai, fai mai ua le toe mafai ona fai iai e foma'i se togafiti. Fai mai le teine ia Sangster, "E te iloa, o le a toe ave e le Atua le vaai a o'u mata."

E umi lava se taimi o nofo Sangster e leai sa na tala. Ona ia fai atu lea i le teine, "Tesi, aua e te tuuina iai i le Atua na te ave, a ia e tuuina atu e oe i le Atua."

"O le a le uiga o lau tala?" O le fesili lea a Tesi.

Ae tali Sangster, "Faaa'oa'ona e tatalo faapea: "Le Tama e, afai lava o le a oo ina ou tauaso atoatoa, fesoasoani mai ou te tuuina atu mo oe le po o la'u vaai." O lona uiga, ia faaaoga e le Atua le po o lana vaai, e ave ma mea e mafai ai ona ia faia nisi mea. E pei o le tauaso o le tamaitai lauiloa o Helen

Keller. Tafefe i le anoanoa'i o mea na ia mafai ona fai ina ua tauaso o ia, ma ave ma fesoasoani tele i le miliona ma miliona o tagata tauaso o le lalolagi.

E tatou te manatua Iopu i aso o ona puapuaga ogaoga, ae ia faapea ane: ".....na ou sau le lavalava mai le manava o lo'u tina, o le a ou fo'i atu i ai ua le lavalava; na foa'iina mai e le Alii, ua aveeseina foi e le Alii, ia faamanuina le suafa o le Alii." Iopu 1:21.

O lona lua o mea e tatau ona tatou fai, o le fai lea o le mea e mafai ona oo iai lo tatou mafai i le fo'ia o le mea ua tupu. O le uiga o le mea muamua e le o lo tatou nofononofo loa e aunoa ma sa tatou taumafaiga e fai. Tauivi e fai le mea tatou te mafai. E le mafai ona maua e se tagata se mea lelei e aunoa ma lona vilivilita'i e saili se togafiti.

E moni lava le upu, e fesoasoani mai le Atua ia i latou e muamua ona latou fai o se fesoasoani mo latou. **God helps those who help themselves.** A na o le tatou tatalo ma nofononofo e leai sa tatou mea e fai, e leai foi ma se tali o a tatou tatalo.

Lafo au avega i le Alii, o ia lava e fesoasoani mai ia te oe.

Measurements

When God measures a man He puts the tape round his heart, not his head.

It isn't the size of your banking account, And the people you have met, The number of dresses and hats that you buy, The amount of regard you can get. It isn't the size of the house that counts, And the crowds you entertain, The number of cars that stand outside, And the servants you retain. The value of jewels upon your hand, And the silver that you possess, The number of miles that you have travelled abroad, The important folks you impress.

It's the size of your heart and the sympathy, The breadth of your mind and love, The value and height of your loyalty, That matters to Him Who's above.

Faamagaloina Faamaloloina Faafouina

Autu o le Fono Tele:

Sa tau saili e le Laulau a le Fonotele ni fulu 'ula e ato ai le faamoemoe o le Ekalesia i leni tausaga 2015. O lea ua ifo tonu le fuiniu i le lalalapa, a o lalalapa e saili ai malo, e toe tapu'e ma fafagu mai i le soifua faatuatua ma galulue o le EFKS.

O le tusi filifilia mai le Evagelia o Luka - ua o gatasi ai le futia ma le umele. O Luka e le o se Iutaia, o le foma'i a'oa'oina, e lautele i ana faamaumauga le atoaga o le soifuaga o Iesu a o feagai ai ma le galuega tala'i, nai lo se isi lava tusi o tusi e fa o le Evagelia.

E maopoopo ma faavasega lelei o mea na tutupu ai, ona o lona tomai ma agavaa (historian skill) i tala faasolopito masuesuega na afua ai le lautetele o ana faamaumauga.

O le tusi faitau filifilia, o loo faailoa ai, e taula'i le faamamafa o le galuega faaola a Iesu, ia i latou e le tauloa, e ta'u faatauvaaina, ae ua faamagaloina, faamaloloina ma faafouina. O i latou ia sa fai ma pologa i na ona po, o nisi o tama'ita'i ma nisi ua feoti a latou tane, o latou ua le amana'ia ona o ma'i o le tino, faatasi ma e fai tofiga i galuega inosia i tu a Isaraelu, e pei o ao lafoga.

Autu:

Faamagaloina, Faamaloloina, Faafouina

Mafaufauga i le Ola Faamagaloina

1. A tatou faamagaloina atu, e le gata ua maua se mapusaga ma le filemu mo i latou ua tatou faamagaloina, ae ua sili ona taua ma lelei mo i tatou lava.

2. Ua tatau ona aoina i tatou, e le na o le faato'ese ua tatou sese, ae ia fai ma feau taua, poo se suiga fou mo le taeao faafouina o lou tagata.

3. E masani ona tatou faapea, faamagaloina ma faagaloina, ae le faigofie i le mafaufau o le tagata, aua e iai faailoga e molimau pea, a o le mea sili, ia aveese e ala i le faamagaloina se avega mamafa, to'atuga ma faigata sa tauaveina.

4. O le faatoesega e le o se faailoga o se toilalo, pe faapea ane, o ai e sese a o ai e sao, ae o le faatauina o le va fealoai ma le amana'ia o le mealofo o le ola a le Atua ia te oe ma au.

O le faamagaloina e le na o tagata ua faatino iai le faato'esega, ae ua saga tutupu ai lagona sa ufiufi e manugase, aua lo tatou ola faaleagaga. O le alofa ma le faamagaloina e le mafai ona tuueseeseina, e soo tino, soo toto lo la faia i taimi uma.

"Aua afai tou te faamagaloina tagata ia latou agasala, e faamagaloina foi outou e lo outou Tama oi le lagi. Afai tou te le faamagaloina atu tagata, e le faamagaloina foi e lo outou Tama a outou agasala." - Mataio 6:14-15.

"Aua tou te faamasino atu, ona le faamasinoina mai lea o outou; 'aua tou te faasala, ona le faasalaina mai ai lea o outou, ia outou faamagaloina atu, e faamagaloina mai ai outou." - Luka 6:37.

"Aua le faatoilaloina oe i le leaga, a ia e faatoilaloina le leaga i le lelei."

Ola Faamaloloina

O Iesu ua afio mai ina ia tatou maua le ola, ia maua atili ai lava (abundant life) o le atoatoa o le ola maloloina i le tino, mafaufau ma le agaga.

"E moni, ua na tauave o tatou tiga, ma na tauave o tatou faanoanoaga, a ua tatou manatu o ia ua taia, ua fasia e le Atua ma ua

faatigaina. Aua manu'a o ia ona o a tatou amio leaga, o le a'oa'iga e filemu ai tatou, sa i ona luga lea, o ona faalavalava foi ua malolo ai tatou." - Isaia: 53:4-5.

O le faamaloloina ina ua faamagaloina i tatou e le Atua, ma tatou faamagaloina atu, e tusa ma le finagalo paia o lo tatou Alii.

Ola Faafouina

Sa pulunaunau ma faatoga Tavita, "Le Atua e, ia e faia se loto mama mo a'u, ma ia e faafouina se loto mau i totonu ia te au." O le tagata ua faafouina ina ua faamagaloina mai soliga tulafono ma ua faamaloloina o ia mai noataga o le agasala.

"Aua o lana lava galuega i tatou, ua faia i tatou ia Keriso Iesu, ina ia faia galuega lelei na saunia anamua e le Atua, ina ia tatou savavali ai." - Efeso 2:10.

O le faamalosi ma le fafagu a le aposetolo o Paulo i le Ekalesia i Efeso. Ua gaogao 'i'i i latou ma le malamalama i le faaolataga. Ua fiafia i le pogisa ma tu faapaupau anamua, ma saga tutumau ai pea. O le ola faapa'iaina e le toe iai ni pa vaeloto o le faitaga'i ma vaeluaina. Na maliu mai Iesu e folafola mai le tala lelei o le leleiga, aua ua faatau maua e i tatou uma o ia o le ala, e sao atu ai i le Tama, o le Agaga e toatasi.

E tatau ona aveese o mea leaga uma e faalavelave mai i o tatou loto, aua o Iesu na te faia ia fou mea uma lava. O le tagata faafouina, ua fou lona natura faaletagata, ua foliga ma amio faafouina, ua ta'ita'iina i le malamalama ma mafaufauga lelei, ina ia avea o ia ma mea faigaluega, e pupula atu le amiotonu ma le pupula silisiliese o le Atua.

Tu ma Aganuu e Ala i le Ifoga

O le aganuu a Samoa e faavae i le talitonuga i le vatapuia, fetausia'i, ma le tele o ana measina. O le alofa, faaloalo,

faaauau itulau e 11

Iva Tausaga o Malaga le Vaa o le Vateatea i le Paneta o Pluto

O le tausaga e 2006 na fana ai i le vateatea le vaa o Amerika e igoa o le “*New Horizons*”, mo lana malaga e tusa o le tolu piliona maila i le paneta o Pluto, a o lea faato’a taunuu i le masina nei, tausaga e 2015. O le Aso Lulu o Iulai 15 2015 na pasia ai e lea vaa o le vateatea e tusa o le 7,800 maila le mamao ese ma Pluto. O lona uiga e iva tausaga o malaga lea vaa i le paneta o Pluto, faato’a taunuu. Ae le’i tu laueleele.

Na pu’eina mai e le vaa ni ata o

le masina aupito lapo’a o taamilonia Pluto e igoa ia Charon. O le tele o Pluto e tusa lea o le tele o le Iunaite Setete o Amerika.

O sailiiliga i le vateatea ma paneta ma masina ma fetu o tumu ai a se tagata Amerika e igoa ia Clyde Tombaugh, 24 ona tausaga, i le tausaga e 1930, na ia maua ai Pluto. Sa galue o ia i le fale vaaifetu o le Lowell Observatory i Flagstaff i Arizona i Amerika.

Na ave i le vaa o le “*New Horizons*” se tama’i atigi e lua inisi le

lautele ae tasi ma le afa inisi le umi, o iai i totonu sina efuefu o Clyde Tombaugh. O le tele o le vaa o le vateatea e tusa o le tele o se piano.

O Pluto o le paneta lea e aupito mamao ese ma lo tatou La o loo latou taamilonia ai. E amata atu i le paneta e pito i le La, o Mercury, Venus, Earth, Mars, Jupiter, Saturn, Uranus, Neptune ma Pluto e tusa o le 3.6 piliona maila (5.8 piliona kilomita) lona mamao mai lo tatou La.

O Pluto e fa ona masina e taamilonia te ia, o Charon, Nix, Hydra, Kerberos ma Styx.

E le’i ta’ua mai i lipoti pe na iai se faamoemoe o Amerika e tu laueleele lona vaa i le paneta o Pluto, pe na ona pu’e mai o ni ata o le paneta ma ona la, atoa ma le ituaiga vanimonimo o loo iai.

E Ui Ina Pi’o le Fofoga....!

mai le itulau muamua

Sa ou tu i tafatafa o le moega o taoto ai se tama’ita’i talavou faato’a mae’a ona ou faia lona taotoga, ua sesega ona foliga, ua pi’o lona gutu pei o le gutu o se tagata fai mea malie. O le mafuaaga, o si tama’i neura lava o lona gutu, e tau atu i maso o lona gutu, ua motu i le taimi na fai ai le ta’otoga. Ma o le a faapea lava ona pi’o e le toe sa’o. Na taumafai lava le foma’i tipitipi e mulimuli ma le faautauta i le ta’otoga o neura ma maso o le gutu, o le mea moni lava lea. Peitai, na aafia lava le tama’i neura lea ua motu, i la’u taumafaiga e aveese le

ma’i o le kanesa mai lona alafau.

O lea e i le potu si ona to’alua talavou fo’i, ma o loo tu mai i le isi itu o le moega ae ou tu atu i le isi itu. O ai i la’ua, na ou fesili ifo ai ia te a’u lava; le taule’ale’a talavou, ma le teine ua pi’o lona gutu ona o lona ta’otoga na ou faia. O loo feva’aia’i i la’ua, ma foliga o le moomoo o le isi i le isi; ma milimili e le isi le lima o le isi.

“O le a tumau ai pea faapea lo’u gutu? E le toe sa’o?”

“Ioe!” na ou tali atu ai i le teine. “O le a faapea lava. Ua mafua ona e iai si neura laitiiti laitiiti lava ua le mafai ona ‘alo

ese ai le tipiga, ma motu ai.”

Na luelue mai lona ulu, a o le taimi lea na fai mai ai le taule’ale’a, “Ou te fiafia iai! E ese le manaia!?”

O le taimi lea na ou faato’a mautinoa ai le taule’ale’a lea; o le to’alua o le teine. Aua o upu o le alofa na ia tautala ai, ma fiafia ma loto tele ai le teine, lona to’alua.

O le taimi lea na punou lemu ifo ai le taule’ale’a, ua faafetaui lelei lona gutu ma ona laugutu i le gutu o lona to’alua, ma feasogi. E pei e taufai fai atu le isi i le isi, e le afaina, pe pi’o pe a, o lea lava e lelei ona ta feasogi. O lea lava e manaia.

*To keep a lamp burning,
we have to keep putting
oil in it.*

Mother Teresa

O La'u Uluai Vavega

O le teine o Peki. A ou mafaufau atu nei i tausaga e tele ua mavae, e oso mai ai lava ma Peki i soo se mea. O Peki, o le uo mamae a lo'u uso e matua atu ia a'u, o Seri. O o matou matua o ni uo mamae foi, o le mea lea, sa matou ola a'e ai lava felata'i.

O Seri ma Peki na a'o'oga faatasi i a'oga maualalo, sosoo ai ma a'oga maualuga, ma sa lolotu foi i le falesa e tasi. E tele taaloga sa taaalo faatasi ai. E ui lava o se uo mafana, ae sa iai foi isi a la uo.

Peitai e ui lava ina iai isi uo, ae sili ai lava ia Peki ma Seri le la faigauo. O le faigauo lea na matua mana'omia ina ua maua Peki i le ma'i o le kanesa o se totoga i lona manava.

E faato'a 17 tausaga o Peki ae maua i le kanesa. O le faaaliga a le foma'i fai mai, e le i'u i se lelei. Na ou matauina le liua o se teine aulelei ma le malos, i se auivi, e tau faaola lava i aso uma ona o lona tigaina i lona ma'i. Ua leai lava ma se manatu e ola. Ae o se

faamanuiaga o Peki mai le Atua, o le iai lea o lana uo o Seri, e fesoasoani ma faalototele ia ia i ona taimi faigata, o lona tigaina, ma le fefe i le oti.

Ou te manatua na ave a'u e lo'u uso o Seri ou te oo ia Peki i le falema'i. Na ona 'ata'ata mai, ma luelue mai lona limatusi, a ua le gaoioi mai lona tino. Ua faigata i isi uo ona vaai atu i le mea ua oo iai Peki, se teine malos ma le fiafia ma taalo, a o lea ua na o le ta'oto, ua le mafai ona nofo mai i luga. Ae sa iai pea Seri i ona tafatafa i le tele o aso, e talanoa ma faamalos ma faafiafia atu iai.

O le isi aso na musumusumu mai ai
faaauau itulau e 15

Faamagaloina Faamaloloina Faafouina

mai le itulau e 9

feosia'i, fetufaa'i ma le felagolagoma'i.

O le ifoga faa-Samoa, o se aganuu faatamalii o loo atagia ai le loto maualalo ina ua tootuli ma faato'ese, o matua o le ua sala, poo le matai o le aiga, o se matai o le nuu, ina ia magalo le sala ma faatumauina le fealofani ma le filemu. E a Ulu tafega ae selefutia ai Vaisigano, o sootaga nei ma mamalu e lepetia uma, i le faatauaina o le va fealofani i la ta aganuu.

E tolu itu taua e taula'i iai lenei faamoemoe.

1. Ua lagona le salamo ma le loto maualalo e faatino ai le ifoga, ona o le mataupu matuia ua tula'i mai.
2. Ua faaaliga e le aiga poo le nuu lo latou masei i le va feagai, ua tuuina atu le ola o le tagata e pulou i le measina e ta'u o le 'ie o le malo, o le faailoga o le salamo ma le loto maualalo.

3. Ia mapu'e le ola faamagalo, ina ia tumau le va fealofani i lana aganuu, e ui lava o se mataupu ua matuia ma ogaoga tele.

O molimau ola ia, o le tatou aganuu ma le faa-Samoa, e o gatasi ma le faa-Kerisiano o loo tatou sapi ai i le olaga i aso uma.

O saafiafaga loloto a le tupu o Tavita, "Le Atua e, ou te alu ea i fea ai lou Agaga? Ou te sola i fea ai ou luma?"

O le nofoaiga a le tupu o Tavita, na faailoa ai e le perofeta o Natano, ua fetalai mai o ia, "O a'u o le Atua na ou aumaia oe ai le lotoa mamoe, na e mulimuli atu i mamoe, ina ia faia oe ma ta'ita'i i lou nuu o Isaraelu." Sa iai le Atua ia Tavita i mea uma, faaumatia i latou sa lamalama e fasioti ia te ia, ma faamamalu ma faatumauina lona aiga ma lona malo e faavavau. Peitai ua 'ai 'ulu tuana'i taisi, ua pogisa mata faaleagaga o le tupu o Tavita, na agasala ai ia Uria ma lana ava o Patisopa. Ua toe oo

Natano i le tupu, ua sui lana pese. Ua fetalai le Atua, "Se a le mea ua e inoino ai i le Afioga a le Atua, ua e faia le mea leaga i ona luma. Faauta o le a a'u faatupu le leaga ia te oe, ai lou lava aiga."

Ua loto maualalo ma salamo le tupu, ua anapogi ma moe foi i le eleele, ua ia talia le oti o lona atalii, ina ia faamagaloina o ia. Ua aveese le agasala a Tavita, ua faamaloloina, aua ua talia tiga ma puapuaga. Ua faafouina ina ua ia faatoga i le Atua, e faafouina se loto mau i totonu ia te ia.

O le faamaloloina o lepele e toasefulu, e toatasi na toe fo'i, o le Samaria e faafetai ia Iesu. Fetalai Iesu, "Ua faamamaina le toasefulu, ae toatasi ua fo'i mai e vivii atu i le Atua, na o lenei tagata ese. Ina tula'i ia, ina alu, o lou faatuatua ua e malolo ai." - Luka 17:17-19.

O le atoaga lea o le faamaloloina, ua te'a le ma'i lepele ma ua maua le tino maloloina, ae ua faamaulaloina lona loto ina ua foi e vivii ma faafetai ia Iesu. Ua atoatoa lona faamaloloina i le tino, mafaufau ma le agaga. Ua

faaauau itulau e 13

O le Mafuaaga o le Pese:

Precious Lord, Take My Hand

“Aua o a’u o le Alii lou Atua, o le ua taofi lou lima taumatau; o le ua fai atu ia te oe, aua e te fefe, o a’u, ou te fesoasoani ia te oe.” - Isaia 41:13

O le nutimomoia o le fatu ma le faapulou mai o faanoanoaga le ma faamatalaina, ina ua maliliu le tina ma le la pepe faato’a fanau mai, na ala ai ona tagi atu Tomasi Tosei (Thomas Dorsey) i le Atua ina ia alofa ma ta’ita’iina atu ia “i totonu o le afa ma le pogisa o le po”. Na avea lea ma mafuaaga o lona tusia o ni fuaiupu ua fesoasoani e faamafanafanaina ai nisi tagata e toatele, i ni auala e le’i faamoemoeina. O le pese la lenei, na tusia e se fatu pese tamauli i le tausaga e 1932, na avea mulimuli ane ma pese mana’omia e

Kerisiano i le lalolagi atoa.

Na ola a’e Tomasi Tosei “o le atalii o le faifeau” i Georgia i Amerika. A o le taimi na amata lauiloa ai o ia i le tusiga o pese faale-atunuu, na amata ai ona fulitua mai i le Atua. Ae ona o le tele o mea e pei na faasaoina ai o ia e le Atua mai mea e ono oti ai, na ala ai ona toe fo’i mai i le Atua. O suiga fou mata’ina o lona olaga na ia amata ai ona tusia pese faaletala lelei, ma pese i sauniga lotu. A o se isi aso a o auai o ia i se tasi sauniga faafouina i St. Louis, Missouri, na ia maua ai se fe’au faauaealesi e logo mai ai ua maliliu lona to’alua ma le la tama i se faalavelave. O le faate’ia o ia i lenei mea, ma lona loto tiga i le faanoanoa, na ala ai ona ia alaga,

“Le Atua, e sili atu le aoga o le tupe apamemea ia te a’u i lo oe i le taimi lenei!”

Peitai o nai vaiaso mulimuli ane ai na tata ai e Tomasi le piano ma ia fatuina laina o le pese: “Precious Lord” mo se fati na te iloa. O le Aso Sa na sosoo ai na peseina ai e le aufaipese a le Ebernezer Baptist Church i Sikako lenei pese fou, ae taina e Tomasi le piano. Na matua maofa ai le faapotopotoga.

Sa faaauau pea ona ta’itaiina o le lima o Tomasi Tosei se’ia oo ina sili atu i le 150 le aofai o pese ua tusia. Mulimuli ane na ia faapea ane:

“O la’u pisinisi o le taumafai lea e aumaia tagata ia Keriso ae le o le tuuai pea o i latou i le mea o loo iai. Ou te tusi ma fatu mo tagata uma o le Atua. O tagata uma lava o o’u tagata. O le mea matou te fetufaa’i ma tagata, o le alofa. Ou te taumafai e siitia o latou agaga ma taumafai ina ia latou iloa e alofa le Atua ia i latou. O loo ia faaolaina pea, ma e o loo tumau pea lona tuuina atu o lea malosi ma le mana.”

Precious Lord, Take My Hand

Precious Lord, take my hand, lead me on, help me stand - I am tired, I am weak, I am worn; thru the storm, thru the night, lead me on to the light - Take my hand, precious Lord, lead me home.

When my way grows drear, precious Lord, linger near-when my life is almost gone. Hear my cry, hear my call, hold my hand lest I fall-Take my hand, precious Lord, lead me home.

Ripoti o A’oga

mai le itulau e 7

le pese. Na pau lava lea o le a’oga e lua mea na sili ai o le tauvaga ma foliga mai ai ua toe ave fo’i e le tatou a’oga lenei le siamupini. Talu ai lenei tulaga, olea na valaaulia ai foi le Kolisi o Maluafou e le Ofisa o Turisi (STA) e faafiafia i le taligamalo a le atunuu lea na uma atu nei mo le All Blacks a Niu Sila.

I taaloga, o loo tulaga maualuga pea a’oga a le tatou Ekalesia - Kolisi i Nuuausala ma le Kolisi i Maluafou

* O le faaiuga lava o Me ma le amataga o Iuni na faia ai se tauvaga lakapi ta’it’oafitu e ta’ua o le “SII-7” (Samoa International Independent Sevens). Sa su’e e le Kolisi a Sagato Iosefo ma le Kolisi i Nuuausala le siamupini ma

manumalo ai le tatou a’oga i Nuuausala i le ipu ma le siamupini.

* Ua mae’a fo’i le taamilosaga lakapi liki a a’oga lea ua sola mai ai ma le tatou Kolisi lava lea i Nuuausala le siamupini o ‘au a tama i lalo o le 18 tausaga, faapena foi ma le ‘au a teine i lalo o le 18 tausaga.

* O le taimi o le tauvaga o le “Samoa Ne’i Galo” na faia ai foi le tauvaga lakapi ta’ito’a 15 a

faaauau itulau e 13

Faamagaloina Faamaloloina Faafouina

mai le itulau e 11

atoa tino o Vaatausili, o ataata foi ia o le tala lelei i le Keriso faamalolo. Ma'imau pe ana tuliloa le tala'aga o lenei tagata Samaria ma lona faafouina, e le taumate se viiga o le Atua i lana foi tala'iga/talalelei.

Aotelega:

Faamagaloina, faamaloloina, faafouina, e fesootai o latou faatinoga, lagona ma mafauauga e afua mai i le loto: loto alofa, loto lelei, loto faamagalo, loto mauualalo, loto salamo ma ua tino mai i le amio ma ua tatou ola ai i le fingingalo paia o Iesu i ana a'oa'oga.

O le Atua o le pule aoao i mea uma na faia, o le Tama o le

faamagalo, pe afai tatou te faamagalo atu, ona faamagaloina lea o i tatou.

O le faamagaloina o le malologa sili lea mo tatou agaga ma faafouina ai i tatou i le ola fou mai ia Iesu Keriso. O le atoaga foi lea o le liu tino tagata o le Atua e ala ia Iesu le Faaola ina ia faamagaloina i tatou mai le agasala, faamaloloina i tatou i le tino, mafaufau ma le agaga, ma ia avea i tatou ma tagata faafouina, ina ua tatou saofaga i le ola e faavavau.

Upu Faaiu:

O lenei Autu i le Fono Tele i lenei tausaga, o se fafagu taua tele ma se'i toe sasaa le fafao i le soifua faaleagaga o le Ekalesia. Ia saili i

le Atua ma lana amiotonu o loo iai le faamagaloina, ona faamaloloina lea o i tatou mai noataga o le agasala. Ae faafouina ai lo tatou ola faaleagaga, ma manuia ai le lumanai o le Ekalesia.

“O lenei le auuso e, ia atili ai ona faamalolosi outou, ia faamauina lo outou valaauina ma lo outou filifiliina, aua pe a outou faia ia mea, tou te le iu vale lava. Aua a faapea, ona matua faaofia ai lea o outou i le ala o le malo e faavavau, o lo tatou Alii, o lo tatou Faaola lea o Iesu Keriso.” 2 Peteru 1:10-11.

O le tatalo le leoa, faanono manu i le Atua ina ia puipui ma faatumauina lo ta faatuatuaga i le Ekalesia, la ta aganuu ma lo tatou faasinomaga. O le tatalo, o le tofa saili, ia faatautai ma faatonutonu folau le Atua, i le tatou faiga malaga a o feagai ma galua ma peau siisii o le olaga i le lumana'i.

Ia manuia le Fono Tele, ona o Iesu. Soifua.

Ripoti o A'oga

a'oga lea ua faaigoaina o le “Violence Free” (sa “Smoke Free”). Na auai atu iai le Kolisi o Leulumoega Fou, ma la su'e siamupini ai ma le Kolisi i Pesega. O le i'uga o lea taaloga na manumalo silisili le tatou a'oga.

I le taimi nei ua faasagasaga atoa galuega i tapenaga mo su'ega a le malo aemaise galuega faai'ui'u o

lenei kuata. Pau lava le isi tulaga o loo tau faalavelavea ai nei tapenaga o le auai atu o tatou a'oga i tapenaga o Taaloga a le Taupulega mo Tupulaga Talavou - Youth Commonwealth Games.

Faafetai le tatalo tapua' i lau Afioga a leTa'ita'ifono ma le mamalu o le Komiti ae tainane le tatalo a le Ekalesia.

motu o Wallis e faapea e tupuga mai i tagata Tonga. A o Futuna ma Alofi e tupuga mai i tagata Samoa. O mamanu o siapo a Futuna e pei o mamanu a Samoa, a o Wallis e tutusa ma Tonga.

E toatele atu tagata e nonofo i Wallis, ma o le laumua foi, o Mata-Utu, ei le motu o Uvea, o se vaega o Wallis.

E 142 sq. kilomita le tele o ia motu, ae tusa o le 12,000 le aofai o tagata, ma o tagata Polenisia. E toatele i le Ekalesia Katoliko. O motu na ulua'i nofoia e tagata Tonga i le tausaga e 1000AD. O le mamao ma Samoa e 225 maila i Sisifo o Samoa, tai tutusa lava ma le mamao o le va o vaega e lua o le atunuu. E tutusa a latou tu ma aganuu ma tu a Samoa ma Tonga, pei o le tatou 'ava.. E 16,000 o tagata o le atunuu e nonofo i New Caledonia.

O Wallis ma Futuna e i lalo o le pule a le malo o Farani.

Valaaulia mai e Wallis ma Futuna 'Au Lakapi Taitoafitu a Leulumoega Fou

E lele mai le vaalele a Wallis-Futuna e aami atu le 'au, toe lele mai e momoli mai pe a uma taaloga ma ni fiafia e momoli mai.

O taaloga taitoafitu e faia i le

aso 12 ma le 13 o Aokuso. E to'a 14 tama taaalo ma faiaoga e toalua.

E lua vaega o le atunuu, o Wallis le isi, a o Futuna ma Alofi le isi, ae va i kilomita e 230. O tagata i le

O Tatou o Maa Ola i le Fale o le Atua

1 Peteru 2:4-8.

I tusi a Peteru o loo ia a'oa'o mai ai ina ia pa'ia tagata mo le Atua. O le fuafuaga a le Atua, ia ta'ita'i mai tagata, e iloga ma matauina o latou uiga, poo a latou amio, e ese mai lava i uiga ma amio a isi tagata. Ona o le faamoemoe o le Atua ina ia faapotopoto mai mo ia, tagata e pa'ia, o e taumafai e teteu atu i le agasala, ma latou fai ni suiga e aveva ai a latou amio o se mea fou i le vaavaai mai a tagata faapaupau o matamata mai. E pei ona fai mai le 1 Peteru 2:12:

“Ia lelei a outou amio i luma o nuu ese, o le mea latou te fai upu leaga ai ia te outou, peiseai o tagata amio leaga outou, latou te vaavaai ai ia outou amio lelei, ona latou vivii atu ai lea i le Atua i le aso e asiasi mai ai.”

O le naunauta'iga mulimuli lea o Peteru a o le'i liliu atu o ia i le mataupu o le ola faale-Atua, lea e amata i le 1 Peteru 2:13.

I le 1 Peteru 2:4-5, o le ata ua tuu mai, o le fale faale-agaga, ma o tagata o le Atua o le fale e pa'ia.

1 Peteru 2:4: “Ia outou o mai ia te ia, o le maa ola o ia na lafoa'iina e tagata, a ua filifilika e le Atua, ua taua lava.”

O tagata o ta'u latou o Kerisiano, e tataua ona faalatalata mai ia Iesu, faalatalata ia te ia i le faatuatua, ma le tapua'iga. Ua faaoga e Peteru se faata'ita'iga ua anamua lava mai le Feagaiga Tuai. O Iesu o le 'maa ola'. O ia o le 'maa ola' aua ua toe tu mai nai e ua oti. O ia o le 'Maa' aua o ona tagata, i latou e talitonu ma faatuatua ia te ia, ua fausia o latou olaga i luga o lo latou Alii. O le Ekalesia a le Atua e pei o se fale. E le o le fale, ae pei o se fale.

1. E iai lona maa tulimanu. O

se faatusa lea e masani tele ai tagata Iutaia. Ona a fau se fale, e filifili e le au faufale, maa e fetai ma lelei. E lafoa'i nisi maa, peitai ua toe saili mai ma aveva ma maa ua filifilia. O Iesu o le Maa. O ta'ita'i o Iutaia o i latou o le au faufale. Ae na latou teena Iesu o ia o le faavae, poo le maa tulimanu, a ua filifilia o ia e le Atua o le faavae ma le maa tulimanu o lana Ekalesia. O ia o le ki ma le tatala i fuafuaga pa'ia a le Atua, o le mea lea e matua taua ai o ia i le Atua.

2. E tele isi maa e fau atu i ona luga. O Kerisiano o i latou ia o isi maa o le fale, o Iesu le Maa Tulimanu. Fai mai le 1 Peteru 2 5:”o outou foi, ia atiinae outou pei o maa ola, o le fale faale-agaga, o le au ositaulaga pa'ia, e avatu taulaga faale-agaga e malie i le Atua ona o Iesu Keriso.”

E tataua i Kerisiano ona galulue faatasi ma le Atua, ma tuu i le Atua le avanoa e na te faaogaina ai i latou i lana fale e 'ola' - o lana Ekalesia. O lona uiga, a ola faaleagaga tagata, poo Kerisiano, o le Ekalesia foi lea. O le Ekalesia lava lea.

3. O le fale poo le malumalu e iai ositaulaga e galulue ai

O Kerisiano o maa, a o i latou foi o ositaulaga. O le vaega lona lua o le fuaiupu e 5 o loo faapea mai: “...o le au ositaulaga pa'ia, e avatu taulaga faaleagaga e malie i le Atua ona o Iesu Keriso.” Latou te ofoina atu taulaga o viiga, o le ola tapua'i, o le tuuina atu o le tagata lava ia e ia mo lona Alii i mea uma na te fai, e fai ma ana faafetai ma taulaga i le Atua.

I le mataupu e 2:6-8 e lua ni mea o ta'u mai i le Feagaiga Tuai, e faasino uma ia Iesu o ia o le

“ma'a” a le Atua.

1. Ua faamaonia e le Isaia 28:16 o Iesu o le maa tulimanu.

“O leni o loo faapea ona fetalai mai o le Alii le Atua, faauta, ou te tuuina i Siona le maa e fai ma faavae; o le maa ua uma ona faata'ita'iina, o le maa tulimanu taua, o le faavae ua mau; o le faatuatua ia te ia e le popole lava ia.”

O le “maa tulimanu” o se maa tele i le faavae amata o le fale, e faaputupu ma fola uma atu iai isi maa o le fola o le fale.

2. O lona lua o mea o ta'u mai e le Feagaiga Tuai e faaalai ai o Iesu o le mafuaaga o le tofi e maua e le tagata. - Salamo 118:22: “O le maa na lafoa'iina

e tufuga fai fale, ua fai lea ma maa tulimanu aupito aluga.” (Peteru 2:7b: O le maa na lafoa'iina e tufuga fai fale, ua aveva lava lea ma tulimanu aupitoaluga, ma maa e tausuai ai, ma papa e tautevateva ai;....”

O le mea o loo taumafai mai iai Peteru e faamalamalama, o loo saili le Atua e faatuina se potopotoga o tagata e pei o se malumalu/fale e pa'ia e fetai ma onomea ona afio ai le Atua. O le ala i le faapa'iaina e aafia ai le felagolagoma'i ma le Atua i le aveva lea ma tagata e fiafia mai iai le Atua. O maa ola e fau ai le fale faaleagaga e fia afio ai le Alii.

O le faamoemoe o Peteru ia aveva ana uo Kerisiano o ni tagata lelei mo le Atua. Ona o i latou o le “fale fou” o le Alii; e fia afio ai o ia.

Fai mai le 1 Peteru 2:9-10: “A o outou o le tupulaga ua filifilia outou, o tupu ma ositaulaga, o le nuu paia, ma le nuu na faatauina mai e le Atua ina ia outou ta'uta'u atu ana galuega lelei, o le na valaau ia te outou nai le pouliuli e oo i lona lava malamalama e matua ofo ai; o e na le fai ma nuu anamua, a o ona po nei ua fai ai ma nuu o le Atua; o e na le alofaina, a o leni ua alofaina lava.”

O E UA MALILIU

Vui Ola Saipele

30 Setema 1932-15 Tesema 2013

O le Susuga i le A'oa'o Fesoasoani ma le faletua ia Maybe Vui Ola, o nisi ia o auaua filiga o le Tala Lelei a Iesu Keriso. E le'i faavaivai pe solomuli i o la tofi ma tiute i le Ekalesia.

Na soifua mai le alii a'oa'o i Lano i le aso 30 Setema 1932, ma ulufale ai i le aoga tulagalua. Sa a'oa'oina i le Kolisi i Vaipouli ma le Kolisi i Tuasivi i le Vaeluagaomatagi. Na galue ma faigaluega i le Ofisa o Faatoaga, mo se vai taimi umi. O le tausaga e 1959 na faaipoipo ai ia Maybe Vaasili Su'a Sione, ma e to'avalu o la alo. E to'afa tama, e to'afa foi teine.

Na faa-ekalesiaina i le 1960, a o le 1963 na avea ai ma tiakono, ae le'i faapaleina i le suafa Vui. O fua lelei lea na luluina e leni

auauna aoga ma lona faletua a o tau amata mai lo la soifua auaua. Sa la'ua aifilofilo i le saofa'iga a tamalii ma failauga sa ta'ita'ia le aulotu, ina ua avea ma tiakono.

E le'i gata le naunau pea o le fia saili o leni auaua i lona Matai, aua o le tausaga e 1965 na faamanuiaina ai i le su'ega a A'oa'o Fesoasoani, ma la galulue punoua'i ai loa i lo la tofi a'oa'o e lagolagosua i le Susuga i le Faifeau Toeaina ia Rev. Elder Mavaega ma lona faletua o Saliga.

O le aso 29 Me 1967, na malolo ai le Susuga i le Toeaina Rev. Elder Mavaega mai le galuega ina ua gasegase. Ae la tau'aveina mai ai loa le galuega, seia oo ina maua le faifeau i le aso 13 Iuni 1968.

Sa tuu atoa lo la malosi ma le soifua galulue i le galuega a le Atua, aua e le'i faigofie ia vai tau i le faigata o le olaga, a o lo laua soifua ofoina mo le Atua ma le Tala Lelei, ua faigofie ai mea uma. O

le ola finafinau ma le tauivi su'e malo, na atagia i le finau a leni auaua, aua o lo la tofi, sa pei e si'umata ma tulimata'i e le Ekalesia, aua ona pau lea o le tagata sa faigaluega i le Ofisa o le Malo, a le Ekalesia.

O lo la tofiga lea o le A'oa'o Fesoasoani sa fai ma sili'aga e le gata i le Pulega, ae oo a i le Matagaluega a Faasaleleaga, aua o auaua tautua afutoto ma afu maligi ua loa aso i le fe'au ma le galuega a le Atua.

E oo mai lava ina faata'otolia i gasegase o le tino le auaua, a ua gagana galuega sa faatino ma le tina ma le fanau, aua le Ekalesia.

O le aso 15 Tesema 2013 na faamanavaina ai feau ma galuega a leni toa o le feau ma le galuega a le Atua, ina ua valaau lona Matai - "Le auaua lelei e ma le faamaoni, ulufale mai i le fiafia o lou Alii."

O ona toe sauniga o lona falelauasiga na faia lava i le malumalu o le EFKS i Lano lava i

faaauau itulau e sosoo ai

O La'u Uluai Vavega

mai le itulau e 11

lo'u uso o Seri, ma ona loimata maligi, ina ia ou tatalo mo Peki. Ma o le mea lene na ou faia. Ma o le mafuaaga foi lene o la'u uluai vavega. Aua na oo ina faasolosolo ina malosi Peki mai lona ma'i na fai mai foma'i e le toe i'u i se lelei.

Na malosi, ona faaipoipo ai lea ma lana uo o Tala sa la a'o'oga. O le tele o aso a o ma'i Peki, e nofonono ai lava Tala i ona tafatafa, ma talanoa iai, ma faamalosi iai, ma milimili ona tino. O ia aso uma, e le'i muta ai lava le faamoemoe o Tala, e toe malosi mai lana uo mai lona ma'i. Ma ina ua toe malosi Peki, ona a'oga ai lea i le Iunivesite, ma maua lona faailoga tikeri faafoma'i.

Ni nai tausaga ua mavae a o matou tafafao ma o'u uso i Kalefonia, ae fai mai Seri o le la e iai foi ma Peki ma lona toalu i le mea o matou iai, ma e o le la e feiloa'i i se taimi latou te fai 'aiga. Na valaauina a'u e lo'u uso matua o Seri, ma te o. A o o'u nofo i le laulau ma matou faafesaga'i ma Peki, Tala ma Seri, ma matou matamata i ata o le la tamafai, o le teine, na ou 'ata'ata ifo i lo'u loto ma ou faafetai i le Atua i le faauoga a Seri ma Peki ua atoa le 30 o tausaga o fai lava. Na ou faafetai foi i le Atua ona o lo'u uso matua na tagi mai ia te au ma faasino le ala, 22 tausaga talu ai, ina ia ou tatalo ai mo Peki.

Na a'oa'o mai ia te au e lo'u uso


matua, le uiga o faauoga mafana, ma le ola tatalo. Ua ou teufatuina lava ia lesone i lo'u loto.

tusia e Georgia Curtis Ling faamatalaina e Afemata T. Apelu Aiavao

*The Heart
of the Giver
makes the
gift dear
and precious*

Martin Luther -
1483-1546: German
Protestant Reformer

ATA O E UA MALILIU



Vui Ola Saipele

le aso 20 Tesema 2013. O le Susuga lava i le tama o le Pulega o Rev. Elder Kaleve Leifi, sa feagai ma le ta'ita'iina o le sauniga lotu, ma o ia foi sa faia se upu faala'ei'au, ma faamafanafana i le tina ia Maybele ma le fanau faanoanoa, faatasi ma aiga na lua.

O ona sauniga mulimuli na faia i lona maota i Talaolupelele i Lano lava ma faamavae atu ai ia te ia. Tau ina faamaise le Agaga o le Atua i le tina ia Maybele ma le fanau.

Rev. Feterika Motu

Kamelina Rosalina Lefono Pii

29 Setema 1962-15 Novema 2014



O Kamelina o le faletua o le A'oa'o Fesoasoani. Na soifua mai le faletua ia Kamelina Rosalina Lefono Pii i le aso 29 Setema 1962 i lona aiga i Lano. Sa a'oa'oina i le a'oga tulagalua ma

faamanuiaina ai lona taumafai i le Kolisi i Vaipouli, sa aoaina foi i le Kolisi i Amoa.

O le tausaga e 1989 na la faaipoipo ai ma Lefono Pii, mai Lalomalava. E toasefulu o la alo, e toaono teine, ae to'afa tama. O se tina sa sili lona tula'i mai i le tau faamaopoopoina o le Mafutaga a Tina, aemaise o le faama'ite o mea lelei. E oo lava i ona tiute faafaletua o le A'oa'o e fesoasoani ai i le faifeau a lona toalua, sa matauina ma le toto'a ona uiga finau malo, ina ia tu maualuga lana Ekalesia, aemaise o le galuega a le Atua e pele ia te ia.

O le mea foi lea o loo maopoopo ma solo lelei ai le A'oga Aso Sa ma le Aufaipese, e oo a i le Autalavou, e matua faaaloaloga foi ma faalogo iai tupulaga talavou, aua e le foi a le 'ote ma le sasa, e faatonutonu a'i fanau ia manuia ma lelei i le lumana'i.

Ou te matua faafetaia le soifua auauna o lena tina, o le tagata e tautala sa'o a i le tagata pe afai o faaletonu. Ua tele lona silafia i le galuega a le Atua, aua ua leva ona tautua ma galulue ma le alii a'oa'o i lo la tofi. Sa la vaaia foi le galuega i Lano, ina ua tuumalo le Susuga i le Faafeagaiga ia Iosefa Maluelue, ma la toe vaaia foi le galuega ina ua leai se faifeau, ua malolo Donald Fruean, mai le galuega.

E le'i faavaivai ai lena auauna, ae sa tauivi ma le ma'elega, ma faaoga le soifua ma le ola mo feau ua tofia ai e le Atua.

Ai lava na manino le auauna i ona aso ua tuu mai e lona Matai e galue ma faatino uma ai ona tiute taua. E le gata o totonu o lona aiga, o lona nuu, a ua molimau foi i lana auaunaga i totonu o lana Ekalesia. E le'i faapa'ole ona ia sii le matalalaga o le soifua ofo atu mo le Atua ma lana galuega.

O le masina o Setema 2014 na

amata ai lava ona faama'ia ma nofo ai loa i lona maota, ae sa ia taumafai mai lava i sauniga lotu. Sa taumafai foi e saili togafiti ma sii i le falemai e faapena foi i Upolu, a ua siliga lava se togafiti e laveaiina ai le auauna.

O le aso 15 Novema 2014 na valaau mai ai lona Matai ia te ia, ma faamanava feau ma galuega o galue ma auauna ai.

Amuia lava lena auauna, o maua mai e lona Matai, a o loo faapea ona fai.

O toe sauniga o lona falelauasiga, na faia i le malumalu o lana Ekalesia e pele ia te ia EFKS i Lano.

Sa ta'ita'ia lena sauniga mamalu e le Susuga i le Tama o le Pulega a Amoa, Susuga Rev. Elder Kaleve Leifi. O le Susuga ia Rev Alofa Ale, sa ia faaulufale maia i le malumalu le tino maliu o le tina.

A o le Susuga ia Rev Lafolafo Amituana'i sa ia faitauina le Tusi Paia, ma le upu faamafanafana sa feagai ma le Susuga ia Rev. Faataualofa Mata'i.

O le tatalo sa saunia e le Susuga i le Toeaina Rev Elder Kaleve Leifi. Ma faai'u atu ai loa i lona oliolisaga tumau i lona maota i Moanaloa. O au sa feagai ma ona toe sauniga i le tuugamau. Ma matou faamavae atu ai i le tina, i le pese a le Au Kerisiano: "Talofa uso e Tofaina oe...Ia manuia lau malaga tina. Ia maua sou nofoaga i le lagi i luga. Faamaise foi le Atua i le Susuga i le Aoa ma le nofo alo, ma aiga.

Rev. Feterika Motu.

Have courage for the greatest sorrows of life and patience for the small ones, and when you laboriously accomplished your daily tasks, go to sleep in peace.

God is awake.

- Victor Hugo, 1802-1885 -
French Poet and Writer